



Hurriyat

Mustaqil gazeta

2025-yil
26-mart
chorshanba
№ 12 (1439)

Gazeta 1996-yil dekabrda chiqqan boshlagan ★ www.uzhurriyat.uz ★ @ gazhurriyat@mail.ru ★ t.me/hurriyatuz ★ f Hurriyat gazetasi

ЎЗБЕКИСТОН РЕСПУБЛИКАСИ ПРЕЗИДЕНТИ ШАВКАТ МИРЗИЁЕВНИНГ “КЎКСАРОЙ” ҚАРОРГОҲИДА ЎТКАЗИЛГАН ИФТОРЛИК МАРОСИМИДАГИ НУТҚИ

Бисмиллаҳир раҳмонир раҳим.
Ассалому алайкум, муҳтарам ва-
тандошлар, нуруний отахон ва она-
хонлар!

Қадри муҳимлар!
Сиз, азизларни, бутун халқимизни,
узоқ-яқиндаги жамияти мусулмон ум-
матини давом этаётган муборак Рама-
зон ойи билан яна бир бор самимий
табриклайман. Барчангизга тинчлик-
хотиржамлик, сиҳат-саломатлик ва
фаровонлик ёр бўлишини тилайман.
Ушбу шарофатли ойда гўзал диёри-
мизда мана шундай файзли ифторлик
маросимини эл-юртимиз билан бирга-
лиқда ўтказиш насиб этгани учун меҳ-
рибон ва қудратли Аллоҳ таолога бе-
ҳисоб шукроналар айтаман.

Фурсатдан фойдаланиб, бугунги
давримизда иштирок этаётган ху-
матли меҳмонларимизга – хорижий
давлатларнинг элчилари, халқаро
ташкilotлар вакиллари, диний кон-
фессиялар раҳбарларига Ватанимиз
ва халқимизга кўрсатаётган юксак эҳ-
тиром ва эътиборлари учун чин дил-
дан миннатдорлик билдираман.

Азиз дўстлар!
Сизларга маълумки, сўнгги йил-
ларда миллий ва диний қадриятлари-
мизни асраб-авайлаш, уларни замон
талаблари асосида ривожлантириш
бўйича кўп ишларни амалга оширмоқ-
дамиз.

Бу борада “Инсон қадри учун, ин-
сон бахти учун” деган эзгу ғоя биз-
нинг фаолият дастурига айланди.
Шу асосда миллати, тили ва
динидан қатъи назар, ҳар бир ватан-
дошимизнинг ҳуқуқ ва манфаатлари-
ни таъминлаш ижтимоий ҳаёти-
мизда етакчи ўринга чиқмоқда.

Фуқароларимизнинг виждон эркин-
лиги соҳасидаги конституциявий ҳу-
қуқлари тўлиқ таъминланаётгани бу
йил Рамазон ойида янада яққол на-
моён бўлмоқда.

Муқаддас динимиз буюрган хайрли
амаллар – аҳиллик ва ҳамжихатлик,
меҳр-саховат, сабру қаноат, ахлоқ-
одоб, илму маърифат фазилатлари
жамиятимизда тобора мустаҳкам бў-
либ бормоқда. Хусусан, ислом дини-
нинг инсонпарварлик моҳиятини чуқур
ўрганиш, буюқ тарихимиз ва мадания-
тимиз дурдоналарини, улуғ аллома-
ларимизнинг бой меросини тўплаш ва



кенг тарғиб этишга алоҳида эътибор
берилмоқда.

Ана шу эзгу мақсад йўлида Тошкент
шаҳрида бунёд этилаётган Ислом ци-
визацияси маркази Ўзбекистонда
илк бор амалга оширилаётган улкан
илмий-маънавий лойиҳа сифатида
мамлакатимиз ва халқаро жамоатчи-
ликда катта қизиқиш уйғотмоқда.

Ушбу марказ неча минг йиллик та-
раққиёт ютуқларини ўзида мужас-
сам этиб, ислом цивилизацияси юр-
тимизда айнан илм-фан, таълим-тар-
бия, маданият ва маърифат асосида
ривожланганини тасдиқлайди. Бу мас-
кан биз учун нафақат ўтмиш ёдгор-
лиги сифатида, балки халқимиз, ёш-
ларимизни келажак сари қорлаши,
буюқ кашфиётларга руҳлантириши
билан аниқсиз эътиборлидир.

Хабарингиз бор, улуғ ватандоши-
миз, ҳадис илмининг султони Имом
Бухорийнинг Самарқандда барпо қи-
линаётган муаззам мажмуаси қу-
рилиши ҳам жадвал давом эттирил-
моқда. Бу ерда буюқ аждодимиз ҳаёти
ва фаолиятига бағишланган музей
ва илмий даргоҳлар билан бирга, 10

минг кишилик масжид ҳам бунёд этил-
моқда.

Насиб этса, бу йил ана шу икки му-
хашам обидани – Ислом цивилиза-
цияси маркази ва Имом Бухорий маж-
муасининг очилиш маросимини бар-
чамиз биргалиқда тантанали равишда
ўтказамиз.

Халқимизнинг ислом дини ва фал-
сафасига қўшган бебаҳо ҳиссасини
янада теран ўрганиш мақсадида
яқинда яна бир муҳим қарор қабул
қилдик.

Бу йил мутафаккир аждодимиз, ка-
лол илмининг буюқ пешволаридан
бири бўлмиш Имом Мотуридий ҳаз-
ратлари таваллудининг 1155 йилли-
гини кенг нишонлаймиз. Жумладан,
ул зотнинг Самарқанддаги муборак
қадамжолари янада обод қилинади.

Энг муҳими, бу ишларимиз Имом
Мотуридий мероси ва мотуридий-
лик таълимотини юртимиз ва хори-
жий олим уламолар билан ҳамкор-
ликда илмий асосда ўрганишда янги
ва катта қадам бўлади.

Хурматли дўстлар!
Кўп миллатли жамиятимизда тинч-

лик ва ҳамжихатликни мустаҳкамлаш,
турли миллат ва дин вакиллари ўр-
тасида дўстлик ва бирдамликни кучай-
тириш вазифаси доимий эътиборимиз
марказида бўлиб келмоқда.

Шу мақсадда жорий йилнинг сен-
тябрь ойида Тошкент ва Самарқанд
шаҳарларида нуфузли халқаро анжу-
ман ўтказамиз. “Декларациялар муло-
қоти форуми” деб номланган бу йирик
тадбир 2022 йили Тошкент, Самар-
қанд ва Бухоро шаҳарларида бўлиб
ўтган анжуманининг манتيқий давоми
бўлиб, турли диний эътиқод вакил-
лари ўртасида ўзига хос маърифий
мулоқот майдони бўлиб хизмат қи-
лади.

Шу ўринда яна таъкидлаб айтмоқ-
чиман: **мамлакатимизда ҳукм су-
раётган тинчлик ва барқарорлик –
бизнинг энг катта бойлигимиздир.**

Ана шу беқиёс бойлиқни кўз қора-
чигидек асраш, юртимиздаги дўст-
лик, тенглик, бағрикенглик муҳитини
мустаҳкамлашга қаратилган ишларни
бундан буён ҳам қатъий давом этти-
раман.

(Давоми 2-саҳифада).

ТУҲФА

Маматқул Ҳазратқулов китоблари тақдироти

Пойтахтимиздаги Миллий матбуот марказида Ўзбекистон Журналистлар уюшмаси томонидан уюшма аъзоси, Ўзбекистон Республикасида хизмат кўрсатган журналист Маматқул Ҳазратқуловнинг “Қирғоқсиз дарёлар” ва “Варақсиз дафтар” номли бадий публицистик асарлари тақдироти бўлиб ўтди. Унда фаол жамоатчилик вакиллари, марказий оммавий ахборот воситалари масъуллари, профессор-ўқитувчилар, ёзувчилар, талаба-ёшлар иштирок этди.



Тақдироти олиб борган Уюшма раиси в.б. Холмурод Салимов мамлакатимизда Президентимиз Шавкат Мирзиёев раҳбарлигида китобхонлик маданияти ва китоб тарғиботида алоҳида эътибор қаратилаётгани, бу борада ижодкорларнинг ўрни, таниқли адиб Маматқул Ҳазратқуловнинг “Қирғоқсиз дарёлар”, “Варақсиз дафтар” китоблари мазмун-моҳияти ҳақида қисқача сўз юритди.

М.Ҳазратқуловнинг “Варақсиз дафтар” китобида муаллифнинг ўқувчилик давларидан тортиб, салкам 60 йиллик ижодий меҳнат фаолиятига нисбатан виждон сарҳисоби, дейиш мумкин. “Қирғоқсиз дарёлар” китобида эса адабиётимиз ва санъатимизнинг даргалари ҳаёти ва ижоди ҳақидаги эсселар-материаллар ўрин олган.

Сўзга чиққанлар томонидан Маматқул Ҳазратқулов забардаст адиб, моҳир журналист, сиёсат ва маданият арбоби деб таърифланди ва унинг “Варақсиз дафтар” асари ярим асрлик яқин тарихимизни қамраб олганлиги, истиқлолга эришиш даврининг барча мураккабликлари ва қийинчиликларини енгил хангомалар қатига сингдириб, бадий талқин қилинган, шу тарихи ўқишли бир гўзал асар яратилганлиги эътироф этилди.

“Қирғоқсиз дарёлар” асарида муаллиф адабиёт ва санъатни қирғоқсиз дарёга мензгани ва бу асарда адабиёт, санъат ва журналистиканинг даргаларининг ҳаёти ва фаолиятини юксак бадий маҳорат билан тасвирлагани таъкидланди.

Тақдиротда “Тафаккур” журнали бош муҳаррири, Ўзбекистон халқ ёзувчиси Эркин Аъзам, Ўзбекистонда хизмат кўрсатган артист, олий тоифали диктор Насиба Иброҳимова, “Халқ сўзи” ва “Народное слово” газеталари бош муҳаррири Ўткир Раҳмат, Уюшма Бошқаруви аъзоси, Ўзбекистон журналистика ва оммавий коммуникациялар университети ректори Шерзодхон Қудратўжа, адабиётшунос олим, профессор Нурбой Жабборов, Ўзбекистонда хизмат кўрсатган журналист Қулман Очил, устоз журналист Қобилбек Каримбеков, “Дунё ўзбеклари” интернет нашри бош муҳаррири Исмаил Хушев ва бошқалар ўз фикр-мулоҳазаларини билдирди.

Маъмур китоблар устоз журналистнинг кўп йиллик тажрибаларини ўзида мужассам этгани билан ҳам қадрлидир. Кенг китобхонлар оммасига мўлжалланган ушбу китоблар журналистика соҳаси вакиллари ёхуд медиа йўналиши бўйича таълим олаётган йигит-қизларга муҳим қўлланма бўлиб хизмат қилади, дейиш мумкин.

Ўзбекистон Журналистлар уюшмаси
Ахборот хизмати.

ЎФИЛНИНГ ЭЛЧИСИ

ёхуд машҳур испан элчиси Руи Гонсалес де Клавихо ҳақида нималарни биламиз?



“...Қирол элчилари Санта-Мария портидан кемага ўтириб, Италия қирғоқларидан сузиб, яъни Генуя, Пиза, Венеция шаҳарларини ортда қолдириб, Грециянинг Родос шаҳрига етиб келадилар. Родос шу оролдаги йирик порт эди. Ундан кейин Туркиянинг Трабзон портига бориш насиб этгач, йўлни қуруқликда давом эттирадилар. От билан Арзинжон, Султония, Кунё, Рай, Техрон, Нишопур, Балх сингари Шарқнинг машҳур шаҳарларига қадам қўядилар. Ниҳоят, бу манзилларни ортда қолдириб, Амударёдан ўтадилар, табаррук замин — Кеш (Шахрисабз)ни иҳлос билан тавоф қилиб, Оқсарой маҳобатидан ҳайратланиб, Самарқанд сари восил бўладилар. Шундай қилиб, улар 1404 йил сентябрда Самарқандга етиб келишади...”



5-6

ИНСОНИЯТНИ СУВСИЗЛИК МУАММОСИ КУТМОҚДАМИ?

Сув танқислиги муаммоси айни пайтда ҳар биримизга тегишлидир. БМТнинг халқаро озиқ-овқат ўқимлари таъкидлаётгани тахминларига қўра, 2030 йилга бориб, доимий суvsизликда яшовчилар сони 4 млрд кишидан ошади. Шу йилга бориб, Ўзбекистонда ҳам истеъмолга яроқли чучук сув танқислиги 7 млрд куб метрга етиши мумкинлиги тахмин қилинмоқда.

2-6

ШЕЪРИЯТ

Хуршид НУРУЛЛАЕВ

ЁМҒИР — БУЛУТ ОТГАН СОЧМА ЎҚ

Ситмоққа қийналар тонг туннинг чокин,
Саҳархез қушларнинг овози аёжсиз.
Сойдаги қатра сув шунчалар сокин,
Шишадай тип-тиниқ, хаёлчан, маёжсиз.

Юкли келин каби кўк юзида доғ —
Бадарға булутлар қайтар самога.
Суйкаси ортидан эргашар япроқ,
Қовун ҳидидан маст юрган сабога.

Супада мурғагин босиб кифтидан
Мушук ялаб ювар унинг бетини.
Мунғайиб қолгандек айвон шифтида
Уста қалдирғочнинг нақшинкор ини.

Талончи шамоллар сочади қаҳрин,
Юлғичлик бошлайди еру азимда.
Бисотида борин — бериб баргларин,
Дарахтлар бош эгиб турар таъзимда.

Қовжираган майса келтириб раҳмин,
Қиров чор-атрофга тўшаб чиққан бўз.
Сарғичранг нимчасин кияркан замин,
Борлиққа қайтадан исм қўйилар — куз.

Куз — мунис онамнинг ҳорғин сиймоси,
Ажинин эслатар япроқсиз шохлар.
Кийишидан олдин олпоқ либосин,
Ёмғирда ювиниб олади боғлар.

Маҳзунлик юкини қалбга ортар куз,
Қорамтир либосин кийган булутлар.
Япроқсиз тераклар ғариб, бенуфуз,
Шохлари ҳурпайган жайрадек тутлар.

Мунғайиб кўз тикар қуриган ирмоқ —
Жар — туман йўлида ётган катта чоҳ.
Ёмғирда жилғага айланган сўқмоқ
Тош йўлдан юришни этади огоҳ.

Азобдан қораяр намозшомгуллар
Бераҳм қировнинг совуқ нишидан.
Тинимсиз тўзғийди хиёбон, йўллар
Бева хазонларнинг намойишидан.

Сўққабош чол каби хомуш тортар кун,
Оташдан мосуво кўешининг нури.
Фигон — хазонлардан бурқсиган
тутун —
Секин қуриб борар кузакнинг шўри.

Маҳзунлик юракни узоқ этмас тарк,
Алвидо, қалбимда инграб ётган сўз.
Тош қотган теракда титрар
битта барғ —
Сўнғги бор қўл силкиб турган каби куз.

Куз қариди — кўёш нурлари
Ёритса-да кунни, тафти йўқ.
Япроқ ерда ётар хўрланиб,
Ёмғир — булут отган сочма ўқ.

Куз қариди — саҳарда қиров
Оққа бўяр майса кокилин.
Шамол кўриб қаршисида ғов,
Синдирар бир дарахтнинг белин.

Куз қариди — кўринмас деҳқон,
Уйку элтган шудгор ерларни.
Туман оёқ қўйиб дашт томон
Яширади кўздан қирларни.

Куз қариди — кўзин юмади
Юлдуз, барғни кўрмайин деб хор.
Хазонларга кўшиб қўлади
Кузни, туни билан ёққан қор.

Энг аввал япроқлар пайқади кузни,
Баргларнинг юзига хавотир кўнди.
Ёзи билан эмиб тоғлардан музни,
Барибир, жилғанинг ҳаёти сўнди.

Булутлар қораяр, недан бу завол?
Қидолмай гоҳида тўқар у кўз ёш.
Тилла тангалар, деб хазонни шамол,
Шошганча, ҳар ерга қила бошлар чош.

Чақмоқ — биз билмаган, балки, сирли сўз,
Англаб етолмаган таъна ё илинж.
Ернинг жамолини соғинган юлдуз
Булут баданига тортарми қилич?

Барглари тўкилган, антиқа дарахт —
Мевалар бўшатмас қўлини шохдан.
Қиш келган, узишга ҳали ҳам барвақт,
Мўъжиза — хурмолар жой олди боғдан.

Куз, маънос нигоҳинг ўртади жонни,
Ахир саодат-ку қутилган якун.
Қай фасл бўлмасин, еру осмонни
Ҳар тонг қарши олсин келаётган кун.

Ҳаво бирам тоза, тўймайсан ютиб,
Сендан кўз узмайди Зомин тоғлари.
Ширин хаёлларнинг қўлларин тутиб,
Яйрайди умрингнинг айна чоғлари.

Арчалар бир муддат олган каби дам,
Чўққига чиқмоқчи — кўкни улғали.
Ирмоқлар сўеига, уят бўлса ҳам,
Яланғоч харсанлар тўймас суйкалиб.

Ўзини ўнг-чапга урар йўл, гўё
Улкан кулранг илон ўрмалар дўннга.
Тонг отган, кўрганинг наҳотки рўё,
Хира ой, қуш каби чўққига кўнган.

Шарманда бўларди гуллар ҳидласа,
Димоққа урилар ҳузурбахш ифор.
Юксак чўққиларга кўз тушган лаҳза
Кўксингга кўчгандек тоғлардан виқор.

Бу ажиб чиройга табиаат она,
Тош, гиёҳ, дарахт, биз асли бир уруғ.
Барча эл-элатга замин ягона,
Ва кўёш — инсоният учун умум туғ.

Эзгу йўй ўйғотди бу қўхна маскан,
Буюк Ипак йўлин ҳикматин айтмай.
Неча бор вайрона бўлса Самарқанд,
Йўл бирла уни эл тиклаган қайта.

Сахролар ётса ҳам манзиллар аро
Йўл учун танланган хавфсиз, сўлим жой.
Йўли берк оламдан тушгайдир айро,
Йўл билан эл яқин, йўл билан юрт бой.

Буюк Ипак йўли бўлса бир шода,
Гаёҳари Зоминдир, ўлмас жавоҳир.
Бул макон сарҳадин кезсанг пивда,
Танангда бардамлик бўлгайдир зоҳир.

Мен яна қайтаман, шу қатъий ният
Кўнглимга ўрнашар метин ўй бўлиб.
Бағрингга келганлар топишсин сиҳат,
Уйига қайтсинлар қудратга тўлиб.

Сафарим қарийди, уйга йўл йироқ,
Ортимдан кўз тикиб қолади Зомин.
Оқ йўл тилагандек, икки ёнда тоғ —
Кафтларини очиб, қилгандек “омин!”



Муаллиф ҳақида:
Хуршид НУРУЛЛАЕВ — 1959 йили Той-лоқ туманидаги Сочакипоён қишлоғида туғилган.
1976 йили Самарқанд туманидаги 56-сон умумтаълим мактабини тугатган. 1976-1981 йилларда Самарқанд давлат архитектура ва қурилиш институтида таҳсил олган.
Ҳозирги вақтда “Нуроний” жамғармаси Самарқанд шаҳар бўлими раиси лавозимида ишлаб келмоқда.
“Ёмғир ҳиди” (2005), “Туғён” (2006), “Муҳаббат мулки” (2008), “Уйнаб гапирсанг ҳам, ўйлаб гапир” (2014), “Ҳаммаси асабдан” (2014), “Муҳаббат бор” (2017), “Кўнгилдаги гаплар” (2017), “Беш фасл ва юрт васфи” (2018), “Бахтли бўлиш ўзимизга боғлиқ” (2019), “Кўнгил чашмасидан томчилар” (2021), “Тафаккур тасвири” (2022) сингари шеърий ва насрий китоблари чоп этилган. Шеърлари тожик, инглиз ва ҳинд тилларига таржима қилинган.
2008 йилдан Ўзбекистон Ёзувчилар уюшмаси аъзоси.



Салим АШУР

ЧАМАНДАГУЛ

Кўчаларга ранглар сонди камалак,
Дўппиларга эргашиб ҳур жамалак,
Сарпо ёйган игна, ип, кашта, палак,
Кўринг атлас, адрас, ипак, шойини:
“Ўзбекистон — Ватан!..” деган жойини.

Ўт тушгандек гуриллади ҳисларим,
Ҳисларимни гулзорлардан изладим,
Изларидан кетиб қолди изларим,
Кўринг адрас, атлас, шойи, ипакни,
Момолардан мерос ёруғ тилакни.

Шарму ҳаё, ибo деган сўзлар бор,
Умид билан термулган не кўзлар бор,
Ҳаёт кўрки — аёллар бор, қизлар бор,
Кўринг шойи, ипак, атлас, адрасни,
Бахш этамиз уларга ҳар нафасни.

Қатим нурдан шошиб қолди ёш кўклам,
Кўтарибди кўч-кўронин совуқ ғам,
Ҳар қадамда симиллайди қовурғам,
Кўринг ипак, шойи, адрас, атласни,
Тоширади кўзларимда ҳавасни.

Ҳилпирайди узун-узун қўйлақлар,
Илдизларин узай дейди тераклар,
Майсаларга айланади кесаклар,
Тиз чўқтирар бизни яна хонатлас,
Жоним қайда?.. Борми бир тоза нафас?..

Таққа қолди бир зумга чархи фалак,
Тегирмони юрсин деб жоним ҳалак,
Юлдуз — кўсак бўлса, ой — бир ҳандалак,
Ёйилади чамандагул дўппилар,
Денгиздаги ҳубобдан ҳам кўп улар.

Кўлда сузган ўрдагим ё ғозимдир,
Қанот ёйса, ё кўпим, ё озимдир,
Бор-йўғингни пана тутмоқ лозимдир,
Майда қадам, танноз қадам, соз қадам,
Етолмайман сизга, алам, жон, алам.

Юрагимни тешиб ўтди кўзлари,
Сўнгра малҳам босди байту сўзлари,
Кўчмандан ҳеч ўтмадилар ўзлари,
Мен тушимни яна сувега айтдимми,
Ё айтмасдан сув бўйидан қайтдимми?

Кафтларига суртиб хино — кимёни,
Лол қолдирди Оврўпа, Осиёни,
Аёл зоти ўзгартирар дунёни,
Кўринг адрас, атлас, ипак, шойини,
Ҳеч ботмаган Ўзбекистон ойини.

Садоқат ҲАМРАЕВА

Тонг нур тутар ташна қароғларимга

НУРЛАНТИРСИН

Бу муқаддас, фазилатли кунларда, дўст,
Ибодатда, бедор ўтган тунларда, дўст,
Қаноатга ноил — хушнуд онларда, дўст,
Аллоҳ ишқи қалбимизни нурлантирсин!

Амалининг ажрин туйиб ҳар банда, дўст,
Неъматларга шўқрин қилмай ҳеч канда, дўст,
Ихлос билан саждага бош қўйганда, дўст,
Аллоҳ ишқи қалбимизни нурлантирсин!

Ғоят гўзал, савоб амал тиловат, дўст,
Хислатларнинг афзалидир диёнат, дўст,
Ҳидоят деб бораверсак, оқибат, дўст,
Аллоҳ ишқи қалбимизни нурлантирсин!

Бордир Аршнинг ризвонидан илинжлар, дўст,
Тавба қилсак, кўкка етсин ўтинчлар, дўст,
Оташида ёндирмайин ўкинчлар, дўст,
Аллоҳ ишқи қалбимизни нурлантирсин!

Ҳар яхшининг қўли очиқ, — дейдилар, дўст,
Хайри борнинг йўли очиқ, — дейдилар, дўст,
Эртасининг ғамин бугун ейдилар, дўст,
Аллоҳ ишқи қалбимизни нурлантирсин!

Бу дунёнинг ғами азал заҳматдир, дўст,
Қаноатнинг ажри гўзал неъматдир, дўст,
Мўминларга иймон асл зийнатдир, дўст,
Аллоҳ ишқи қалбимизни нурлантирсин!

РАЙЁН САРИ ЙЎЛДИР — РАМАЗОН

Табарруқдир фарзи бу ойнинг,
Муборақдир файзи бу ойнинг,
Ҳаққа элтмоқ фазли бу ойнинг,
Ҳикматларга мўлдилр — Рамазон.
Райён сари йўлдилр — Рамазон!

Бандасига бўлсин деб фурқон,
Бунда нозил қилинган Қуръон,
Шуқур, етдик рўзага омон,
Ҳимматларга мўлдилр — Рамазон.
Райён сари йўлдилр — Рамазон!

Ҳамма ойдан афзали ўзи,
Муқаддасдир кеча-кундузи,

Рўзадорнинг ёруғдир юзи,
Қийматларга мўлдилр — Рамазон.
Райён сари йўлдилр — Рамазон!

Иймон — қалбни мунаввар айлар,
Ҳидоятга муяссар айлар,
Аллоҳ зикрин мўътабар айлар,
Хислатларга мўлдилр — Рамазон.
Райён сари йўлдилр — Рамазон!

Фазилатга сероб ойдир бу,
Қабул бўлар тавба-тазарру,
Гуноҳларни қуйдирар мангу,
Рағбатларга мўлдилр — Рамазон.
Райён сари йўлдилр — Рамазон!

Бир кеча бор, Қадр кечаси —
Минг ойга тенг, ажр кечаси,
Тиловату тақбир кечаси,
Зийнатларга мўлдилр — Рамазон.
Райён сари йўлдилр — Рамазон!

Савоби кўп қаноатингни,
Хайр-эхсон, саховатингни,
Тиндирмасанг ибодатингни,
Неъматларга мўлдилр — Рамазон.
Райён сари йўлдилр — Рамазон!

Аллоҳ ажри, иноятига,
Умид қилсак шафоатига,
Олғай ҳифзи ҳимоятига,
Раҳматларга мўлдилр — Рамазон.
Райён сари йўлдилр — Рамазон!

САБР БЕР

Чап кўксимда оғриқ бор,
тош ютганга ўхшайман,
Қир ошишга улгурмай,
дарз кетганга ўхшайман.
Илвиреган юракни туйтуларим ўртайдди,
Ширин жоним хунхори, қайғуларим ўртайдди.

Ховурланган қавариқ — орзуларим мазори,
Ўз ҳолига қуйса дил, қуюклари озор.
Тиргаб қуюк кўнгилини,
нураб борар бардошлар,
Қотиб қолган лош каби кипригимда кўз ёшлар.

Ғамғуздор дил, ғамнок дил ҳаётнинг сийловими,
Тақдирнинг сийловлари
сабримнинг синовими?!

Соқий, селоб жомини ғамбодасин ювиб бер,
Дилкосамни тўлатиб, менга сабр қуйиб бер.

КЕЛ, БАҲОР!

Қор остида унса митти бойчечак,
Гул очса, бандидан узиб кел, баҳор.
Қорлар сувга дўнса, нур тутгач шафақ,
Шошқин шалопадан ўзиб кел, баҳор.

Бодом гулбаргларин қувиб, қувлашиб,
Жушқин жилғаларда сузиб кел, баҳор.
Ялпизга айланиб ариқ лабида,
Яйдоқ адирларда кезиб кел, баҳор.

Тўрғайлар учганда қанотин қоқиб,
Кўкка камалақлар чизиб кел, баҳор.
Турналар қайтишсин аргимчоқ солиб,
Қушларни изингдан тизиб кел, баҳор.

Сеп ёйса чўчмома, очилса лола,
Мен учун шодалар тузиб кел, баҳор.
Ҳар ташна байтимга сингдирай сени,
Васфингни гулларга ёзиб кел, баҳор.

ЎЗГАЧА

Тонг нур тутар ташна қароғларимга,
Фараҳбахш онларни интиқ кутгандай.
Оҳиста силкинар бодом шохлари,
Қушлар нағмасига хиром этгандай.

Мастона термилсам баҳор васфига,
Кафтимга тўкилар оқ, пушти гуллар.
Кўнглимнинг жунуний майлини сезгандай,
Бир ажиб буй тутар ўйноқи еллар.

Ўрик шохларида рангин гунчалар
Қуртагин тарс ёриб гуллаш азмада.
Ошифта кўнгилнинг завқин ошириб,
Кўрк ила сафолар йўллаш азмада.



Муаллиф ҳақида:
Садоқат ҲАМРАЕВА — 1990 йили Каттакўрғон туманида туғилган.
Шеърлари мунтазам вақтли матбуот саҳифаларида эълон қилиниб келинади. Хусусан, “Шарқ юлдузи”, “Ёшлик”, Туркиянинг “Güncel Sanat” журналларида ва “Кўклам баёзи”, “Турон таронаси”, “Уйғоқ қалблар овози”, “Пиллапоя” каби жамоавий тўпламларда шеърий туркумлари эълон қилинган. “Кўнгил кўзгуси” номли илк шеърий тўплами нашр этилган.

